



Dok. ref.
12/1327-2/K1-007//JKO

Dato:
27.05.2013

ETISKE RETNINGSLINER FOR FOLKEVALDE

Innleiing

Tillit til folkevalde i offentlege organ er ein føresetnad for lokaldemokratiet. For å oppnå tillit må det vera høg etisk kvalitet på tenesteyting og utøving av mynde. Gjennom det er ein med på å bygga eit godt omdømme som aukar handlingsrommet til dei folkevalde og gjer det mogleg for Øygarden kommune å fylla rolla som ein god tenesteytar, samfunnsutviklar, forvaltningsorgan og arbeidsgjevar. Målet med desse etiske retningslinjene er at folkevalde skal vera seg dette bevisst, og ha ei reflektert haldning til etikk i sitt daglege virke.

Retningslinjene har grunnlag i allmenne etiske verdiar og normer som ærlegdom, rettferd, lojalitet, openheit og tillit samt kommunen sine grunnverdiar. Omsynet til innbyggjarane skal vera i sentrum for kommunen si verksemd. Dei etiske retningslinjene gjeld for alle folkevalde i Øygarden kommune. Kvar einskild folkevald har eit særskilt ansvar for sjølv å følgja dei etiske retningslinjene og å sjå til at desse vert etterlevd i kommunen.

1. Informasjon og offentlegheit

Det skal vera openheit og innsyn i forvaltninga slik at ålmenta kan gjera seg kjent med verksemda i kommunen og slik kunna få innsyn i korleis kommunen utfører oppgåvene sine. Informasjon som vert gitt til ålmenta skal vera korrekt og objektiv. Fortrulege opplysningar som vert mottekne i samband med tenesteforhold, må ikkje brukast til personleg vinning.

2. Teieplikt

Folkevalde i Øygarden kommune har teieplikt fastsett i lov eller medhald i lov. Kommunikasjon av sensitive personopplysningar må ikkje skje på ein slik måte at uvedkommande får innsyn. Teieplikta gjeld også etter at vervet som folkevald er avslutta i kommunen.

3. Habilitet og interessekonfliktar

Folkevalde i Øygarden kommune skal ikkje opptre på ein måte som er eigna til å svekke tilliten til at dei er upartiske. Brot på habilitetsreglane kan føre til at eit vedtak vert kjend ugyldig.

4. Omdømme

Folkevalde skal ikkje opptre på ein slik måte at menneskeverdet vert krenka eller at omdømmet til kommunen vert skada, eller slik at publikum og brukarar (elevar, pasientar, tenestemottakarar m.m.) misser tillit til kommunen eller tenesteutøvaren.

5. Gåver og fordelar m.m.

Folkevalde skal ikkje, verken for seg sjølv eller andre, ta imot eller leggje til rette for å ta imot gåver, reiser, hotellopphald, bevertning, rabattar, lån eller andre ytingar eller fordelar som er eigna til, eller som givaren har meint, å kunne påverke tenesteutøvinga eller avgjerdene. Folkevalde må ikkje bruke ombodsrolla si til å skaffe seg sjølv eller andre ein urettkomen fordel. Dette gjeld også i tilfelle der desse fordelane ikkje er eigna til å påverke tenesteutøvinga eller avgjerdene.

Representasjon og liknande skal haldast innanfor vanlege normer for sosialt samvær. Dersom leverandørar m.v. tilbyr reiser o.l. er det ein føresetnad at kommunen dekkjer utgifter til reise og opphald. Rammeavtalar med leverandørar skal ikkje brukast av folkevalde til privat bruk med mindre det er rabattordningar som er ålment tilgjengeleg for alle tilsette i kommunen. Dette gjeld og dei folkevalde sine næraste.

Kommunen sin logo, brevhovud eller porto skal aldri brukast i privat korrespondanse. Dersom folkevalde kjem opp i problemstillingar knytt til gåver m.m., kan spørsmålet leggjast fram for kontrollutvalet.

6. Forretningsdrift

Kommunen si forretningsdrift skal vera basert på god forretningskikk, sikra at ein følgjer gjeldande lover og reglar, og bidra til at kommunen når sine mål. Alle innkjøp i kommunen skal gjennomførast i samsvar med lov og forskrift om offentlege anskaffingar og kommunen sin innkjøpspolicy.

7. Berekraftig utvikling

Folkevalde i Øygarden kommune skal vere seg bevisst det samfunnsansvar som følgjer forvaltning av fellesskapet sine ressursar. Folkevalde i Øygarden kommune skal bidra til å byggja bruer mellom folk og forvaltning, til beste for den enkelte, lokalsamfunnet og komande generasjonar.

Vedteke av Øygarden kommunestyre 22. mai 2013 - sak KS.41/13